

29. **Franca sekcio de ISAE** estas starigita kaj gvidata de provizora komitato de tri personoj: inĝ. E. François (delegito), leŭt. kol. A. Hellebold, inĝ. C. Naoumoff. La sekcio havas 54 membrojn, kaj do krom prof. M. Fréchet ankaŭ s-ro F. Gaume nun estas komitatano. La sekcio dissendis stian unuan cirkuleron. Ĉar la sekcio povas havi aldonajn kotizojn por kovri siajn elspezojn la kotizo estas 600 fr, kaj ne 500 fr. kiel estas anoncita en informo 24.

30. **Norvega agadkomitato de ISAE** estas formita de la ISAE-anoj d-ro O. Reiersøl, inĝ. O. Rygg kaj s-ro C. Støp-Bowitz (delegito).

31. **Dokumentado.** En Nederlando kelkaj esperantistoj aranĝis daŭran laborgrupon „Esperanto en la Dokumentado”, en kiu oni i.a. pritraktas la tradukadon de UDK.

32. **Japana kotizo** por aktiva membro (kun Scienca Revuo) nun estas fiksita je 540 jenoj.

33. **Helpabonoj.** Studenta Esperanto-Klubo, Kopenhago, pagis abonon de Scienca Revuo por ke la fratina klubo Studenta Esperanto-Grupo ĉe la Universitato de Osaka, Japanujo, ricevu nian revuon. Tio estas imitinda ekzemplo kaj rimedo starigi pli intiman kontakton kun membroj en landoj el kiuj oni ne povas sendi monon.

34. **Astronomio.** La ISAE-membro prof. d-ro Y. Väisälä, Astronomia observatorio de la Universitato de Turku, Finnlando, donis al du novaj asteroidoj (n-roj 1421 kaj 1462) la nomojn *Esperanto* kaj *Zamenhof*.

35. **Kongresa kunveno 1950.** La membroj de ISAE estas vokataj al kongresa kunveno dum la Universala Kongreso de Esperanto la 5-12 aŭgusto 1950 en la Sorbonne-universitato, Parizo, je tempo anoncita en la kongresa programo.

Propono de tagordo:

1. Aprobo de tagordo.
2. Elekto de sekretario por la kunveno.
3. Jarraporto kun ekonomia raporto. Revizora raporto.
4. Demando pri senŝarĝigo.
5. Budĝeto por 1950.
6. Raportoj: a) Unesco, b) Internacia Elektroteknika Vortaro. c) Kontakto kun aliaj oficialaj instancoj. d) Landaj raportoj. Terminara laboro.
7. Presigo de plurlingvaj propagandfolioj.
8. Aliaj demandoj.

Propono de budĝeto por 1950:

Enspezoj	sv.kr.	Elspezoj	sv.kr.
200 plenaj kotizoj	1230.00	200 abonoj de SR	1100.00
200 kotizoj sen SR	145.00	afranko	100.00
		presaĵoj, papero	150.00
		kotizo al UEA	15.00
		gajno	10.00
Sume sv.kr.	1375.00	Sume sv.kr.	1375.00
	(= £ 158.0.0)		

36. **Delegito de ISAE en Meksikio:** Inĝ. A. Luna Cardenas, Tehuantepec 27-J. MEXICO D.F. Jarkotizo de aktiva membro estas 12 pesoj.

Sven Alexandersson, sekretario de ISAE.

Estimata Sinjoro Redaktoro,

511.213 : 511.424

S-ro S. J. Garvey atentigis min pri du eraroj en mia artikolo pri la disfaktorigo de grandaj nombroj; ambaŭ rilatas al la nombro P (13, 101) (Sc. Rev. 1, 52).

La unua, pli grava, estas ke la citita nombro ne inkluzivas 13 kiel faktoron; tio estas mia kulpo — la rezulto de mistransskribo el miaj notoj.

La dua eraro estas, ke la citita nombro enhavas la primon 79 du fojojn, nome estas oblo de 79²; ĉi tiu eraro, kiu ankaŭ aperas en la originala traktato de Lehmer (Amer. Math. Monthly, 1936, 347), kompreneble neniel malutilas dum disfaktoriga uzado de la nombro. Por atingi la ĝustan valoron de P (13, 101) necesas nur obligi la cititan nombron per 13 kaj dividi per 79; la rezulto estas: —

$$P(13, 101) = 100\ 806\ 218\ 337\ 011\ 844\ 545\ 481\ 955\ 359\ 526\ 997.$$

Kiril Fabo.

546 : 001.4

S-ro Austin M. Patterson el Xenia, Ohio, Usono, membro de la Komisiono Internacia pri la Nomenklaturado de Kemio Organika, tutmonde konata inter la fakuloj pro la „Ring Index”, la „Handbook of Chemistry and Physics”, kaj pro sia kemifaka vortaro germana-angla, k.t.p., atentigas pri tio ke la „decidoj” de la Internacia Kemia Unio pri kiuj mi skribis en Sc. R. 2 40, efektive estas nur rekomendoj al la naciaj komitatoj kaj ke definitivaj decidoj ne estos farataj antaŭ 1951. S-ro Patterson opinias ke la angleparolantoj — kaj oni povus aldoni: france-, itale-parolantoj, k.t.p. — ne estos inklinaj akcepti la nomon *volframo* anstataŭ *tun(g)steno*.

Fine s-ro Patterson deklaras ke li tute konsentas kun s-ro Duncan (Sc. R. 2 39) pri la nedezirindeco alpreni ian tute novan kemian nomenklaturon por Esperanto.

$$378.183.4 = 089.2(489) : 378.18.067.1., 1950''$$

Internacia Esperantista Studenta Tendaro, Danujo 1950.

En Kopenhago viglas Studenta Esperanto-Klubo (vidu ankaŭ ISAE-informon 33, p. 78), kies prezidanto estas la ISAE-delegito por Danujo (vidu la bänderolon de ĉi tiu numero). Ĝi eldonas propran, ciklostilitan gazeton, la bänderolon de ĉi tiu numero). Ĝi eldonas propran, ciklostilitan gazeton, per kiu ĝi esperas intimigi la kontakton kun similaj kluboj kaj kun unuopaj studentoj kaj universitatanoj en eksterlando. Aperos minimume 8 numeroj kun meze 6 paĝoj. Jarabono kostas 4 danajn kronojn aŭ 10 rpk. La S.E.K. kunlaboras kun Dana Internacia Studentkomitato, kiu aranĝos en la venonta somero 8 internaciajn studentajn tendarojn. En unu el tiuj la oficiala lingvo estos Esperanto. Ĝi estos Arkeologia „Tendaro”; (fakte oni loĝos en hotelo). Gvidate de inspektoro de la Nacia Muzeo, la partoprenantoj dum du semajnoj faros elfosan laboron en Aggersborg, fortikajo el la vikinga epoko. Oni laboros 40 horojn semajne, perlaborante 1 kronon tage. En la libera tempo estos ekskursoj, diskutoj kaj diversaj distraĵoj, en kiuj la partoprenantoj estas

petataj aktive partopreni, ekzemple per deklamado, muziko, k.t.p. Dum la tria semajno oni faros multajn ekskursojn, aŭdos prelegojn (esperantajn) pri Danujo en la universitato, gastos ĉe membroj de la Kopenhaga Studenta Esperanto-Klubo.

Unuvorte: La programo estas treege alloga. Daŭro: de la 30a de junio ĝis la 20a de julio. Partopreni povos gestudentoj (ankaŭ de seminarioj), bone parolantaj Esperanton, aĝaj 17-32 jarojn. Specialaj fakaj kvalifikoj ne estas postulataj. Prezo: 80 danaj kronoj (£ 4). Oni mem prizorgu poŝmonon kaj la necesajn vizojn. Petu detalajn informojn kaj aliĝilon. Aliĝu baldaŭ.

Adreso: Dana Internacia Studentkomitato, La Universitato, St. Pederstraede 19, Kopenhago, K, Danlando.

019.941

Bibliografio.

= 089.2 = 52(048) : 52(05) = 945.41(471.1)

Tähtitaivas 1949 N-ro 10, (Turku, Finnlando, Yliopisto), finnlingva astronomia gazeto mencias sian enhavon ankaŭ en Esperanto. Du artikoloj, nome pri „Preciza metodo por observi la okultaciojn” kaj pri „Nova metodo por konstrui gigantajn teleskopojn”, ambaŭ de Y. Väisälä, la redaktoro de la gazeto, havas esperantlingvan resumon. — Turniĝanta prismo antaŭ la objekto de teleskopo ebligas determini la momenton de okultacio kun precizeco de ± 0.03 sekundo sen rimarkinda persona eraro.

Grandaj teleskopaj speguloj povas esti farataj per muntado de pluraj malgrandaj speguloj sur fortika, sed malpeza fera skeleto.

= 089.2 = 53(048.6) : 061.12(492).055.1

En la **Proceedings of the Koninklijke Nederlandsche Akademie van Wetenschappen** aperis ankoraŭ du artikoloj el la laboratorio por aero- kaj hidrodinamiko de la Teknika Altlernejo en Delft (Nederlando), nome:

„Note on the damping of the rotational oscillation of a spherical mass of an elastic fluid in consequence of slipping along the boundary” de profo d-ro J. M. Burgers (vol. 52 113), kaj „Solutions of the equations for the non-uniform propagation of a very strong shock wave” de W. P. Robbertse kaj J. M. Burgers (vol. 52 958). Ambaŭ artikoloj havas esperantajn resumojn.

408.9 : 408.92(023)

Aperis: d-ro W. Manders, **Interlingvistiko kaj Esperantologio**, 77 p., 242×159 mm², broŝurita. Prezo: ned. guld. 2.25; 5 angl. s.; \$ 0.75. Eldonis: J. Muusses, Purmerend, Nederlando.

Enhavo: Enkonduko, Interlingvistika Parto, konsistanta el tri ĉapitroj kun la jenaj titoloj:

La interlingvistiko kaj Esperanto. — La naturalismo de Edgar de Wahl kaj Otto Jespersen. — La naturalismo de IALA. — Esperantologia Parto, konsistanta ankaŭ el tri ĉapitroj: Taskoj de la esperantologio. — La evoluo de Esperanto. Lingva Korekteco. — Kompara Esperantologio.

Ĉi tiu interesa verko de samideano d-ro Manders kiu antaŭ kelkaj jaroj doktoriĝis per disertajo nederlandlingva „Vijf kunsttalen” (Kvin artefaritaj lingvoj), plene meritas la interesiĝon de ĉiuj seriozaj esperantistoj kaj ceteraj interlingvistoj.

Ĝi starigas grandajn taskojn al la Esperantologio, kaj elvokas interesajn diskutojn. En venonta numero de Scienca Revuo ni pli vaste diskutos ĝin.

W. P. R.